

太

函

集

太函集卷之二十一

新都汪道昆伯玉著

序十三首

溪南江氏族譜序

昔方伯居廬帥宗人立祖廟其後方伯謁告籍舉宗而譜之譜成則以觀汪伯子伯子卒業作而言曰道昆聞之尊祖故敬宗敬宗故收族夫世窮則澤熄澤熄則忘親盡則疏疏則無紀故尊祖則有廟饗收族則有宗盟夫旣廟之又從而譜之神人和幽明洽矣許由有言有族有祖祖者徂也義重則尸仁輕則祧

高曾而上無得而稱雖有慈孫其於著存何有乃今聚族而居父兄子弟咸在出入則同吉凶慶弔則同序事則同堂會食則同席由是而反其所自始優然如將見之收族故宗廟嚴非虛語矣客曰在譜別子爲禎繼別爲鄭伯季皆禎出也或在婺源或在開化鼎足而立莫不阜昌合之則大宗矣譜之不載何居伯子曰仲尼作春秋合列國而宗魯周禮在魯於是乎宗魯宗而列國舉矣古者國有國史家亦宜然譜者史之流也有人於此以縣寓爲家以昊天爲祖以四海爲兄弟以鳥獸爲同羣合併爲公誰曰不可顧

鄉隣閉戶室中勃谿事之必至者也故同之則楚越  
非異異之則肝膽非同與其以異而同無寧以同而  
異作者辨諸此矣客曰江故蕭氏著于漢顯于梁其  
在遺策可攷已乃今由唐以上不籍本始之謂何曰  
仲尼誦法先王三墳五典具在刪書則自堯舜始其  
斯信而有徵乎江氏由唐以迄于今可以考信作者  
唯傳信之務則始終於唐蓋其慎也仲尼居魯魯秉  
周禮則宗之禘則傷之夫魯非后稷之裔文之昭與  
尚安事禘客唯唯於是與之觀譜例嘆曰善哉簡而  
核婉而廉疏而有則法之良也與之觀世系嘆曰遐

哉林林乎歷世二十有五歷年七百存歿無慮八百  
有奇若字若官若昭穆若婚姻若丘墓若婦若不婦  
若爲人後若後人指諸掌矣與之觀撰述曰萬全之  
烈巨卿之勲國士也民瑩而在山林其有興乎君子  
以是知江氏之多材也與之觀制曰王章也其有家  
之華與與之觀訓掩卷而嘆曰洋洋乎大哉有道者  
之言宗之庇也力是數者可以亢宗矣客曰善哉觀  
也觀盡於此乎曰何可盡也古者敦睦以合族君子  
難之夫合族之難非合之難也以身範族之難也非  
身範之難也能以族範身之難也是故族大則張小

則削富則豪舉貧則恣睢張而折之則行違削而振之則力詘語之勤禮則富者以爲負俗語之勤力則貧者以爲薄施示之纖儉彼或以爲厚藏示之廉貞彼或以爲要譽故勇可以奪三軍而不可以加九族力可以抗萬乘而不可以弭周親躬行何如耳夫鷦鷯非族也而胥化螺螄非類也祝而肖焉維其有之是以似之躬行之謂也作者蓋有之矣將無似乎方伯降席稽首曰伯子之及此言也舉宗之德也抑世世誦之勿絕豈惟珍

送江民璞詩序

諸方伯部中置按察使奉三尺法以糾吏民其操柄視中執法等乃今權移部使者而按察使取具官卽往往致崇高去 高皇帝約法不啻千里比年江以西獄大起諸漏網者悉該之除惡毋滋亡不愉然快也 詔補按察使則吾郡江民璞當行嗟乎民璞長者也往治邑治郡治兵江以西悉宜民璞如使其俯仰高下民璞安能要以謹守約法務境內稱平則民璞宜矣昔曹參相漢庶幾乎一代宗臣觀其以獄市寄齊其功用率由不擾起聞諸老氏至察無徒此參意也有道者獨多參世儒或以爲訾昔臯陶爲士不

越乎欽恤而爲言胡可訾也民璞行乎哉往民璞參知浙江嘗請兵破賊卒保父母之國江以西亦吾隣也茲得民璞又將波及於其隣澤今至矣二三子習民璞且侈其行各賦詩若干言內詣行李余故法家吏也不忘故事猶緩頰及之

璫溪金氏族譜序

金自秬侯受姓遂以門戶甲長安其後避地吾郡中五徙而得璫溪乃益昌阜元末治中父子以用武顯多捍禦功我成祖初御史操法廩廩庶幾乎骨鯁之臣則皆璫溪產也無論世有顯者卽二三君子俶



儻大節視昔玕貂七葉又何讓焉叅軍得謝東歸作  
璫溪譜其目凡十其義則叅軍所取材璫溪爲海陽  
隩區其川谷多蘊藉自昔經始協于地宜作著居第  
一其先南徙由皇墩而白茆由白茆而石田由石田  
而洲陽由洲陽而璫溪皆問右也乃今璫溪最著望  
於諸宗考卜之功於是爲烈作遡遷第二由漢迄今  
千有餘歲按籍而爲之世系傳信之謂何故遡遷始  
於石田著代始於遷祖蓋以遷祖爲別子自別子而  
下悉譜之他若黜非其族貶失節名教存焉作序族  
第三宗法不立天下無家尊祖敬宗然後收族作明

宗第四治中御史邦家之休凡厥後人無念爾祖作  
徵賢第五士不家食一命皆足以顯揚果能毋失官  
常亦賢者事作錄仕第六閨帷之德相外不聞厥有  
從一靡他煌煌乎與國士爭烈作見節第七君子之  
言信而有徵若太史所職郡邑所載方策所存是已  
作存述第八裒翰第九文獻足矣其必循理守正無  
忝先人藉令俗不雅馴惡用聚族爲也作陳俗第十  
其事核其律嚴其言往往稱先王壹以反本脩古爲  
務蓋譜之良也余旣卒業爲之長太息者三嗟乎俗  
之漸人也久矣蘭芷漸於滌中君子不服其所漸然

哉世之人或擬高位或擁素封則其家赫赫矣舉宗數十千指露積相望冠蓋如雲則其宗赫赫矣若此者彼所謂克家亢宗者也有則以有矜人無則矜人之有語之以隨夷曾史彼焉用之鄙人有言何知仁義已饗其利者爲有德此俗之大較也彼將以赫赫爲司命以仁義爲瘠疢甚則箕帚耨鋤見於辭色何有於期功疆近又何有於塗之人假令沿俗不知其非則後之視譜者亦猶越人之視章甫耳叅軍故爲清白吏其躬行足爲諸子弟先乃今陳俗善惡聚族而訓之使其惇質行而薄芬華務孝弟而黜姦利士

不必名世要之賢良農不必千鍾要之力本商不必鉅萬要之廉賈及其久也靡然顧化其爲克家亢宗也不亦赫赫乎哉蓬生麻中不扶自直顧所樹何如耳叅軍灑然曰語有之一歲樹穀十歲樹木百歲樹德瑤幸得聞長公之言百世之德也籍之

御史大夫思質王公奏議序

上卽位初脩先帝之治故臣死非法者悉追錄之臣世貞世懋上言先臣忤受知先帝往往著尺寸功坐失當事者心中之法詔論故御史大夫功狀復其官二子次公奏議數十百篇登簡記余受而卒

業蓋不知涕霑襟云嗟乎人臣之進言難矣居常而危明主臨不測而批逆鱗此爭臣事也言聽則利社稷不聽則死生以之卽自輕唯此七尺軀耳乃若封疆之臣守在多壘外患猝至不暇豫謀彼皇皇枹鼓之間決策千里之外上陳當否下繫安危此之爲難難之難者也唯直亮通明之士徇主急而後其身炳幾先而冥中其會庶幾乎勝任矣初公爲御史蹇蹇直言得爭臣體及虜驟入烽火格於郊關公自軍中以聞遂登陴而厲城守此何時也公於是有通州之役大將軍新集士馬芻粟不支先帝方督過行間

人不自保又何時也公於是有軍儲之役島夷犯吳  
越騷動江南民不知兵無能救死于其頸時事急矣  
公於是有東南之役已而雲中急則徙雲中遼薊急  
則徙遼薊其難可知也乃今觀其所指畫省若括轉  
若樞斷若折薪料敵形若觀火無論直亮之節通明  
之才當其時勞苦功高猶可概見彼諧人者卒以一  
青掩之嘻太甚矣譬之射者左布侯則命之中侯右  
布鵠則命之中鵠置七札則命之貫札百步而置楊  
葉則又命之穿楊遞命而遞應之不遺餘力一不中  
命睚眦者幸得而甘心公無死所矣景帝故知御史

大夫鼎錯袁盎間而殺之七國方以錯爲兵端其間  
易入故也往錯數以策干文帝卒不用其言景帝新  
立錯用事淺而言深故不免耳通州之戍 先帝當  
戾而署姓名由直指拜御史大夫由東南歷試西北  
則皆 先帝意也不可謂不知矣乃公小用則小利  
大用則大利不可謂不效矣顧憾者當事其權倍盎  
且什百之乘間投人鮮不中者卒之鄧公明錯無罪  
而盎死國門天定勝人固非虛語 先帝法當事者  
具五刑 上錄御史大夫二子方以國士嚮用天道  
于今烈矣惡在其能勝天邪余觀錯所上書論兵者

誦之勿絕要以功見言信公視錯猶賢史臣方執簡  
記錄先帝骨鯁之臣如其文獻足徵則御史大夫  
在

### 太守陶公論最錄序

會稽陶公守新安以循良著公既遷去郡人相與祠  
事之比年春秋鄉大夫帥諸父老若子弟有事祠下  
歲丁卯二月脩祀典如常會天子改元明詔初下  
諸父老相語曰聖主加惠元元與海內更始則以  
郡縣吏治責在行部諸臣德意蒸蒸厚也自有郡縣  
以來可與佐百姓者唯良二千石吾郡界在山谷行



部者歲一至焉當公居郡時徵發萬計公以一人任  
事境內人人繫公以爲安比旣遷猶能爲故郡畫便  
事罷千里之役省不貲之需安得如公者若干人徧  
置列郡行部者可無事事矣諸子弟則曰 高皇帝  
重三輔地建官爲詳吾郡以南國隩區隸在三輔所  
部則御史大夫一人部使者六人郎署監司或置或  
否羣然立二千石上四面臨之稟命則從吏專行則  
沮格難矣難矣頃者大墨用事往往干當路權或務  
詭隨譴舉無當公獨以直道事上上之人率以直道  
信公程功累事凡五年諸御史大夫部使者郎署監

司交譽公於朝凡二十七牘卽先帝以良二千石  
賜吾郡吾郡饗二千石之賜居多乃若公之志得行  
無從更無沮格則又當路之賜也諸父老曰唯唯公  
等不聞鶴鳴之詩乎處下而聲宏有本者如是耳夫  
不獲乎上難與治民藉令民治不脩其何能獲惟公  
孳孳民治不以詭遇從禽居郡者五年稱最者二十  
七牘鶴鳴子和誰曰不然下懷其仁上旌其伐固三  
代直道之遺也鄉大夫曰辨哉諸父老之言信能睹  
公之大較矣卽其名實充溢公何心邪舉世務以吏  
治立名乘人而騁其捷伺上若射隼罔下若掩羣其

始發也人不及知鮮有不中久則技單於此人其謂何乃公身不勝衣言不出口由由然事上必以道相下必以情機辟不入於心其獲多矣昔人逍遙海上羣鷗狎之一旦生心鷗卒不至至誠爲能動物豈虛語哉於是諸父老徧攷所部與公於朝者牘而載之將與俎豆俱存以示不朽旣成籍則以觀道昆道昆故知公遂述其說辭序之首簡

軺中集序

今上詔修先帝實錄下諸部督學使者采拾以聞南畿爲高皇帝舊都自昔以文獻甲天下部使者

在事召江都文學歐大任任之文學奉檄入都再挾  
日而畢事伏軾所至謁園陵望宮闕歷名山大  
澤周游薦紳學士及諸故人稱詩凡若干言則自輅  
中授弟子旣成籍介吳生謁余序之往余從文學鄉  
大夫得文學高義時文學畱滯都市則又得文學都  
市詩卽南海多奇宜莫如文學及余從三山索文學  
語在集中文學善稱詩往往在都人士口當世二三  
作者莫不推轂文學率下之其在輅中不更僕可數  
矣昔班固張衡左思並以名都賦顯豈不鉅麗乎哉  
夫賦者古詩之流具在風雅古之行役者大都憂王

室而閔勞人情見乎辭安事枝葉諸賦不遺餘力夫  
非作者之極思與本諸事情則枝葉茂矣文學陸沉  
淮海翩翩諸博士間乃今海內治安舊都不啻天府  
文學載筆從事幸得託行役而畢游觀誦其詩則所  
謂治世之音矣方之諸賦卽廣狹不同要以因事陳  
辭務在言志雖意氣溢發而壹歸于雅馴譬之安車  
蒲輪大路越席得時而駕豈必九旂七就而後行遠  
乎嗟乎函嶠河洛之都鼎足之業其間多所湮滅而  
諸賦炳焉獨存概於立言則不朽之效也文學官薄  
顧于于安之殆將爲名高希不朽耳乃今所就業五

侯七貴何有哉如使畢力以從古人庶幾得當大舉  
語曰鷲鳥累百不如一鶚文學幸而出此卽當世何  
讓焉吳生曰善

孤憤集序

胡司馬有社稷功中憾者卒死請室 今上畢錄  
先帝故臣功狀置司馬不以聞司馬藁葬山中諸門  
下士若故人無一至者沈山人爲司馬誄則自四明  
走墓下哭之初吳虎臣及余二仲氏郊勞山人山人  
馬首東矣問曰司馬猶被此名以歿山人哭者何山  
人慷慨言曰司馬功蓋東南非臣一人以也往臣竊

觀司馬多大度憎喜自如當意輒予千金不當輒嫂  
罵臣非禮弗食故千金不及臣然坐客多賢豪貴人  
司馬目攝之不爲禮比臣在坐意獨屬臣臣居與居  
臣起與起其所嚴事者宜莫如臣乃今身隕而名不  
傳臣固未得死司馬所耳臣病三年矣孤憤上通於  
天天且爲臣隕泣又明日諸君東望百里外雨霏霏  
自大鄆來此臣哭司馬時也厥明日出無光頃之雨  
至與語合於是山人過不佞相與登舍後山出司馬  
誄讀之四坐憤發不佞起長跼進曰我國家倚辦  
東南不啻外府天胙司馬幸不蔑東南此所謂社稷

功也 高皇帝以八議釋有罪必先議功 先帝故  
嘗多司馬功歟司馬非 先帝意也卽司馬亡論已  
柰何傷先帝之明不佞 先帝舊臣願爲山人壽虎  
臣次進曰孤不肖嘗遇司馬前茅孤方引諸少年挾  
吳姬楚女履舄遮道呵者至曰客何爲孤叱曰母多  
言客高陽酒徒吳守淮也司馬嘆曰嗟乎此吾故人  
子引車避之於是人皆謂孤狂謂司馬長者往島夷  
起吳越率以澤量人司馬提三尺劒全活之何論億  
兆及司馬不辜歟卒無能發一辭非山人則皆喑者  
矣孤德司馬于今終不能忘孤願爲山人壽次二仲



氏進曰凡諸功罪有主者兩生不敢知當司馬時彼都人士莫不藉寵靈被恩澤司馬一旦受法則羣起而誹訛之彼何能顧嘗嫚罵我然今噉嫚罵則昔抵千金者也彼其視怨如丘山視德如流水謂司馬何食人之德而有二心士之恥也幸山人出且爲都人士一洗之司馬以好士聞今得士矣願爲山人壽酌畢白雲起東海亘青天而西於是相與東鄉酹曰司馬有靈掇甲皚皚至矣二三子屬不佞揚挖其事則以山人所自賦若爲山人賦者附之

傳美錄序

今制列卿百執事獻最 天子 天子以璽書爵其  
父母及其室家 上有大澤亦如之俾其廣孝作忠  
世世爲臣子勸夫士童而執業白首患不成名卽掛  
一職于朝日媿媿焉患不稱積勞而稱患不中程幸  
而壹得之臣子之上願也或在父子或在兄弟其能  
兩得者幾何乃若濟美承家父子兄弟內外皆得斯  
當世所希覲者已劉氏故楚著姓徙居貴州余對公  
車蓋從中丞君後旣通籍則麗江公爲余父行頃府  
君由京兆出新都中丞君弟也劉氏自麗江公而下  
封章十下于家府君籍之梓人以明世守都人士相

與揚光其事爲府君休籍旣成府君授簡而屬余序  
昔人之稱不朽者抑亦有取于世家非直侘世爵以  
爲芬華本之乎世德足多耳若漢之石氏韋氏豈不  
煌煌乎盛哉或以躬行或以經術其皆得當天子聲  
施無窮彼其金張許史之豪福澤盈眦然而功名不  
著後世罔聞則世德非也 明興二百餘年貴州文  
物盛矣 先帝以孝治天下吏治起而爵賞行焉麗  
江公起家成均於是有成均之命其後政成治郡請  
老黔中二子脩故業而益張接武青雲之上中丞君  
由治邑起進工部尚書郎兩以最聞於是有繕部之

命先帝有事宮闕繕部多所奏功進光祿少卿復  
論最於是有光祿之命府君丁年受檄議獄鄖陽以  
最聞於是有鄖陽之命及府君由鄖陽召入爲京兆  
理中丞君乃由京兆開府鄖陽今上改元覃恩如  
制麗江公得賜爵如伯子府君亦以畿內加封於是  
有中憲之命承德之命熒熒炳炳勳府載之自麗江  
公以至府君自母恭人以至諸妣氏外內備矣近世  
若關中彭氏洛下許氏西蜀楊氏東越孫氏皆海內  
名家其在貴州宜莫如劉氏自府君監兵吾郡四境  
晏然枹鼓不聞夜犬不吠所謂民之父母不虛矣里

人子聞人舉其父母莫不喁喁乃今舉命出于朝  
廷非謏聞矣都人士從而響應不啻雷聲雖其知德  
有淺深修辭有工拙要皆好德之所發親上之同心  
也儒者誦法孔子雅聞治民獲上信友悅親之言府  
君兼此而有之庶幾乎信而有徵矣府君謂是籍也  
寧詎敢負君命以自多顧自父兄以及下臣罔  
恩轉至下臣無以報塞萬一其明示後世以志不忘  
禮家有言先世有美而不知不明也知而不傳不仁  
也仁明不伐府君有焉恭之屬也遂舉是籍而命之  
曰傳美余緩頰爲之先鳴云

嘉生園草引

海陽曹生詹生陳生皆卓犖自負顧獨親不佞相與  
下之曹生著義若干篇兩生業已定其文矣挾策而  
就不佞願聞法言不佞自結髮起家學未成而釋業  
乃今屏跡山澤日與漁獵者俱顧安得聞書生言請  
言漁獵夫執竿以投鯢鮒族漁也設辟以候狐往族  
獵也此其大氏也其甚也發人之笥拊人之罟竊其  
獲而有之則盜漁盜獵也至若任氏之漁羅氏之獵  
一舉而殂腥東海囊括上林偉矣要以特千載一觀  
夫非僅僅者哉世之以經術進者掇舊聞執田論是

謂族儒甚則勦說雷同塗時人耳目以幸一逞盜之  
屬也吳會毗陵二三君子所謂僅僅者非邪當今之  
時族儒什九盜儒什三吳會毗陵曾不能以萬一何  
者其所操者廣其所獲者奢也曹生始以童子受博  
士業授之以諸生經藝則掩卷廢之授之以老莊左  
史諸名家則喜高論諤諤十年不售於有司都人士  
謂曹生柰何以狐白當暑曹生笑曰諸君皮相耳惡  
識被裘去而游吳越之都躡屣出飛來峰上左大澤  
右滄溟都鄙郊墟山川草木爛焉錯采生恍若有得  
仰天嘆曰文在是矣興至則操觚載筆翩然周遊時

而坐書時而抔飲橐旣具篋而藏之若蟬蛻若鵬搏  
飄飄乎有凌雲之氣矣歸就郡大夫試首曹生就縣  
大夫試首曹生 今上改元曹生應詔往主者得曹  
生牘首舉之主司乃大奇生然守繩墨卒不置高等  
生愈益知名矣然生率以師心爲務其材不羈俯視  
族儒眇乎一鱗羽耳其餘亡論已引于繩墨則吳會  
毗陵之徒與詹生陳生謂余曹生好直言喜兵事  
上方孳孳求治思得彼其材而推轂之勉矣曹生行  
且漁獵生矣

醫方摘要序



先帝湯沐在楚楚忘其勞 今天子閔而休息之悉  
罷望祀分封營修轉運之役捐諸侯王不急之奉有  
司亡能奉德意率由前取盈歲荐饑楚不堪甚直指  
陳使君按楚檄庶司校出入以爲經於是省歲計二  
十萬緡屬掌計者籍之以待司會始使君入境期當  
進退文武吏士勞倍往年夙夜皇皇不遺餘力數有  
疾所至醫無良乃竊嘆曰使者奉身行部中直以安  
危繫妄庸人手卽窮鄉下邑謂疾苦何旣自沅之荆  
會水大溢使君蒿目溝壑全活數千百人無何疾益  
甚則自衡州召二醫至疾始平使君以爲良命二醫

籍醫方之有驗者得若干卷屬梓人布筴將與境內  
共之藩大夫程督梓人挾日而告成事夫醫者意也  
得意者亡法何論方昔秦越人以神醫聞必先授禁  
方長桑君所醫之有方也猶匠氏之有規矩也車之  
有轍迹也漁獵者之有筌蹄也方何可廢哉關雎麟  
趾不廢周官皆是物也且也養生若養民去其害者  
是已乃若使君之籍歲會按籍可揆其方無論良有  
司不啻燭照而數計之矣第今中庸以下猶知嚮方  
雖禱机興害而不廣不習爲吏視已成事固非虛言  
往不佞居子舍中則家中丞以方書授不佞孺子有

四方之事脫有事醫藥不必皆良縱自輕其何以保  
遺體第篋之往猶之索埴得塗醫之次也不佞唯唯  
受而納諸篋中卽有所用之其驗較著然此直一家  
言耳乃今二醫所籍帑軒岐繹長沙河間主葵朱氏  
而餒及諸家庶幾備矣豈惟三戶抑亦海內賴之

楊忠愍公集序

嘉靖中大將軍仇鸞主市議幾誤國楊忠愍力言其  
謬不可鸞間入貶臨洮無何族鸞名還忠愍忠愍  
則又極言大學士嚴嵩不法狀嵩主吏議傳上刑會  
縣官欲論他囚忠愍不免其後七年而嵩敗嵩子世

蕃伏誅

今上奉

先帝遺詔卹諸直臣首忠愍

先帝操下廩廩其明日月其威雷霆兩䟽較若丹書  
聞者可立辨已一不入則貶再不入則施之何急也  
諸先後言事者率皆骨鯁之臣要以得罪狀而務盡  
言宐莫如忠愍當忠愍抗䟽豈不當先帝心無亦  
視將相若股肱將藉之以奉社稷投鼠猶然忌器况  
社稷乎衣不敝不新成股肱謂何耳故寧失藥石無  
寧失股肱彼一時也及庸人上變而鸞族諫者後至  
而籍蒿家藉第令能言何有加于疇昔卒之一怒而  
罪無赦則忠愍先入之日更而明雷伏而震其所由

來者漸也夫兵莫憚于志無論鎡鋸忠愍起牧豎間  
居常不忘溝壑方其討罪君側其志不萬死豈發  
哉縱彼反戈中之業已剗刃於其腹然則忠愍所御  
其殷帝之含光邪後之人言聽而法行則鎡鋸之屬  
也人謂忠愍以直言歿明主未之前聞卽二氏殲  
曾何足以當忠愍夫鸞跋扈嵩父子爲邪憂在社稷  
忠愍以身當社稷身歿而社稷無憂得歿所矣先  
帝不舍忠愍而卒用其言歿且不朽天王聖明猶  
將報恩地下忠愍豈虛語哉初忠愍當大辟王元美  
抵嵩客說嵩會嵩黨格客議不行遂甘心忠愍元美

從徐子與及諸郎哭忠愍郊外治其喪嚴氏跡之螫  
諸哭郊外治喪者於是元美首及難子與亦行乃今  
詔下九原二大夫遽起元美自魏爲忠愍狀籍其遺  
書傳魏都子與分部漢陽則以籍授孫漢陽傳之楚  
余入楚子與屬余序之當二大夫哭忠愍時余在告  
往余欲爲忠愍立傳會有 詔錄 先帝故實亡敢  
侵官元美有良史才狀備矣孫漢陽爲大宗伯公子  
余從忠愍元美後皆公門下士云

青蘿館詩集序

余聞之作者曰有唐以詩鳴蓋本業也大曆而下不

齊波流隆則隆汗則汗論其世可已當世以經術論  
士士顧能詩 太祖始興草昧間作弘治則李獻吉  
何仲默副以徐昌穀諸曹超乘而前去輓近世千里  
矣嘉靖則李于鱗王元美而徐子與吳明卿宗子相  
參焉于鱗謂余吾黨亟稱獻吉恨不與諸君子同時  
不自意結伍從之取前茅以進幸也夫前者崛起後  
者代興百年之間駸駸進于大雅非適逢世能乎人  
言李何故相驩卒以名高爲敵國乃子與嚴事于鱗  
元美直將尸而祝之二子周視中原亦首推轂子與  
子與朝明卿而夕子相率譔譔無面從退而語其私

則交相重也務以上人已愈下務以下人已愈尊由  
斯以談于鱗固非虛語世儒率以耳視後死者將無  
與焉幸而在茲遂中睚眦於是于鱗引去元美以難  
去子相去而死明卿去而三徙之子與晚得汝陽尋  
徙去此其故勿論已頃于鱗多子與日益則豈窮而  
工耶子與稱詩無慮數萬言籍而授門人僅什之一  
于鱗蓋嘗定之矣余受而卒業汝陽以後參居二焉  
自子與罷郡歸四方之屨滿戶客奉不給則貸入繼  
之窮矣顧其神益王其業益精其受益較著窮何病  
子與哉善隱者謂楚奉江潭爲三閭湯沐其所奪者



狹其所予者奢饗其利者以爲有德然則左輔夜郎  
皆食邑也寔世世饗之彼其退若隊淵終其身不召  
道喪世矣 今上卽位遞起諸大夫于鱗入大梁元  
美入晉子與入楚當世以此勸士故得士彬彬則明  
德茂也獨明卿陸沈南海豈天意奉明卿邪子與又  
言楚人三試而賜執珪今及明卿矣

長原程氏本支譜序

昔楚屈平祖高陽漢司馬遷祖顯頊兩人並以作者  
顯學士至今稱之乃若四代之禘郊祖宗皆是物也  
作者莫盛於孔子其所刪述莫嚴於尚書春秋顧尚

書始於帝堯春秋始於魯隱夫豈未逮墳典而謂周公之德衰邪與其遠取以稽疑無寧近取以傳信此明聖之所爲務後之良史與稽焉新安多閭右世家莫不有譜本支百世可攷而知要以文獻足徵視四方備矣顧承平蕃息不可勝原代有污隆從而升降甚者浮慕赫赫竊附以爲名高乃今載在郡書亦或無當概諸典則何有於一家之言往不佞謝尚書郎宗大夫屬不佞爲吾宗譜旣而謝中執法鄉大夫屬不佞爲郡書不佞遞以爲難力謝不敏及不佞入仕邦政會程叅軍汚爲本支譜成紹介其諸子本中取

材不佞不佞習本中博雅使概言之本中進曰郡中高門戶者無慮數千百家而諸汪諸程最著譜者無慮數千百牘然亦惟二姓最難何者世濟蕃殖轉徙多門久之會食愈疏宗法不講其卒也邈若秦越奚翅塗人抑或比黨亂羣謬爲同異爲同則外相糅爲異則內相戕樹敵于盟焉用譜矣故大宗伯起家舊史嘗譜統宗迄今猶有後言其難可知已吾宗自周得國至晉太守始家新安梁開府以忠壯特開廟食于祀迄於有宋始遷長原是譜於長原獨詳則譜者所自譜也藉今以大宗爲號務睹其全著之代則自

周以來凡九十二世繫之姓則自吳郡而連吳楚通  
伊洛凡九十八區將必旦暮千古家至而人見之卽  
巧歷不能得已乃今自封祖而下垂七十二世具在  
都官譜則仍之自遷祖而下垂二十世具在宗祏可  
更僕而終則悉書如例其詳略則余小子竊取之矣  
謹待命先生嗟乎不佞不能譜吾宗焉知程氏顧二  
姓猶之一軌也嘗試言之吾宗命氏潁川有如伯符  
受國及漢龍驤南渡視元譚守土先焉開府越國並  
興閭閻相望猶之秦晉兩大申以婚姻凡在宗盟大  
氏皆神明之胄矣吾宗什室而九豈不足多近世若

鱗溪之譜大宗亦一阨也司徒故受室宗伯豈相授  
然邪往忠愍公推轂不佞任之誠自知其不及其後  
欲爲里中譜自始遷下達則譜之潁川龍驤揆厥攸  
始越國茲降爰及諸宗僅舉其凡無庸世系會不佞  
有四方之事蓋有待焉作者先得不佞之心譜可已  
譜可已本中曰敬諾在禮何如不佞聞之禮有禘有  
祫宗有百世有五世其曰別子爲祖則始遷百世之  
宗與時謙是已太守肇基開府徇國功德施諸後世  
惡在其不禘哉由遷祖而遡之世澤之斬久矣久則  
不可爲典於是乎祫之恩不瀆親義不凌節禮之善

經也且也王者分王列國各祖其始封之君雖其本之則同不敢干祀魯不王而禘仲尼非之乃今同姓諸侯王率脩古而未改然則長原之禘遠祖而諱遷祖其誰曰不然不佞以禮發家譜者庶幾乎得禮意矣本中避席曰開府有功社稷比屋且尸祝之乃今繹開府而尸始遷此難與衆庶論也微君子之言有微且將不信請揭諸首簡詔之

太函集卷之二十一

太函集卷之二十二

新都汪道昆伯玉著

序九首

文選序

司馬氏曰自書契以及詩書則聖人無擇言矣後之言者非文不行如其文惡得無擇故離朱辨色師曠審音梁昭明由此其選也夫隆污各以其世潤澤存乎其人其世則春秋秦漢魏晉齊梁其人則屈宋鄒枚賈馬蘇李班楊曹劉嵇阮潘陸陶謝其體則衆長具矣譬之黼黻錯陳金石迭奏概諸後死者文在



茲乎由是相沿以世爲次或曰文粹或曰文鑑或曰  
文衡皆是物也作者之視時昔業已經庭藉令擇焉  
而必精其去昭明駸駸遠矣 明尚經術學士非六  
籍不談凡諸柱下所藏不少概見新都故文獻閣也  
都人士猶知昭明不佞結髮起家乃獲卒業始則津  
津乎其合也旣則渙乎其將離久則參而伍之依依  
乎其不忍舍也六籍尚矣迺輓近世而其說長世儒  
近取而遠攻耳日塗矣一旦釋故策而新耳目豈不  
津津乎哉屬下里者易爲聲歌衣大布者易爲文繡  
何以合易入故合也始吾求之昭明三年而未得也

去而爲史遷又五年而未得也去而爲左氏又十年而未得也去而爲老爲莊之數子者業有成書不遑稱載幸而窺其典要煌煌成一家言譬之九成六章聲色殫矣彼其聞道百者惡足以侘大方何以離求多故離也中歲而陳五車排衆戶乃知世之趨愈下也卽猗韋氏之波流與故赤日不耐不爲堅冰絺綌不耐不爲狐貉岷山積石不耐不爲江河天地且不違他可識矣如必老莊左史之是而昭明之非也是猶蒙絢緯而廢狐白望岷山祠積石而堙江河諱也吾故參而伍之依依乎其不能舍也然則文粹而下

不皆非邪振川澤以絜江河轉犬羊以禦狐貉君子  
以爲猶諄也說者謂昭明羅百家蒐七代總之爲卷  
三十不亦儉乎近世或廣之或補之蓋舉其全也竊  
惟江河不集而足狐貉不緼而溫如將畢取其所棄  
猥云加少以爲多諄之諄者也當世之論士者具曰  
文勝認認焉務敦朴以維風夫文而不慙則漸俗然  
矣乃若博士諸生之所修業惡在其能文卽文矣曾  
不足以一當昭明惡在其能勝千金敝帚將謂文何  
崔大夫治新都壹稟於躬化大氏削雕爲朴思從先  
進而亟反之至其業博士諸生則梓昭明善本而布

之境內諸生之師教者蓋彬彬矣大夫齊魯士也固  
宜嫻於文哉

### 三都興誦序

我守君之爲馮太公壽也幸然屬不佞先鳴於是鄉  
大夫若都人士無不咸獻其言待守君命守君采其  
馴雅者介使君而籍奏之庭蓋獻者無慮數十曹言  
者無慮數十牘駸駸備矣旣而鄉之杖者從郡老更  
聚族而踵青門叩成籍狀不佞纚纚乎其告之也則  
相顧而嘆曰吾儕小人日在野而不知政徵司馬揭  
岷山封積石吾其爲江河羣飲者邪始使君以佐計

入郡中民不知賦進而佐兵事民不知兵項之川谷  
不虞使君以監司庚至而居者行者不知暴客旣徙  
其身而捐故部民不知使君業已去部中使君方以  
五鼎奉太公民不知其躋大耋而貞初度也鄉大夫  
若郡人士亦所斌斌而嫻于辭吾儕穀食而褐衣櫛  
枝而野鹿言不越乎丘里業不舍乎耰鋤浸假而歌  
擊壤謠康衢敢不卷舌藉第令比于里耳庶幾乎芻  
蕘之言將因司馬以陳太師惟君侯命不佞受而卒  
業則其義近古而辭不華擬之公家上郡之歌殆庶  
幾矣顧使君方自吳入楚而吳楚並以聲歌擅場吾

人猶懼其不雙寧取足於閭巷竊惟古之爲壽者莫  
善於雅而與人之誦尤莫善於風凡今鄉大夫若都  
人士所稱者穆如清風祝而願之則南山有臺之類  
是已其出郡老更者本之以自始繫之以去思若麟  
趾若甘棠風風乎南國之遺音也疇昔陳詩列國而  
楚無風屈宋以還詩在楚矣今之吳古之楚也新都  
略吳楚之裔空不足以張楚而重吳顧曹之鳴鳩其  
亂至今不廢麻枲管蒯空不相捐幸得而嗣徽音請  
附末簡守君曰善古者蕢稗土鼓其風豈不洋洋申  
之以控楊攄簫從之以鍾鼓管籥則二雅具矣風先

於禮其所由來則然人亦有言禮失而求之野乃今  
求之野則獲獨禮云乎哉如使得當使君請以郡老  
更爲桴鼓

一歌曰三天子都鞏皇輿山谿四塞高下居石田鱗  
鱗不可畚城烏啄啄農無餘君自蘭臺就停車寬租  
薄稅編民紆褒然我君三輔首誰其舉之南極叟願  
粒萬鐘薦南斗一粒一歲增黃耆二歌曰大郭之東  
起伏戎我君東行宿莽空憑陵一望馮夷宮鬱葱佳  
氣浮長虹居然中立嵩高同申甫承家大小馮死如  
岱華柱蒼穹山靈時時出雲雨先我舊邦後率土穰

穰千秋歌且儻三歌曰川有塗敷萑苻使君再至建  
蜚孤鯨鯢爲醢釁天吳真州大估千舳艫路鬼不敢  
私擲掄江流白如練屏實赤如日何以報公家終年  
無聚鵠

右三老之歌

一歌曰陟彼紫陽東望扶桑瞳瞳出日燁燁重光日  
如何其舍于暘谷其光伊何照臨比屋蟠根託于陽  
林挺出而累百尋上有棲鳥三足頭不白而常黔二  
歌曰陟彼霞城東望四明其陽巨浸珊瑚叢生其陰  
上腴梁木冬榮有來自東九臯鶴鳴二雛咸在倡和



同聲通駿厥聲聞於穆章爾仙禽授公子服三歌  
曰登天都望海島赤城以南莫不靜好方丈爲帷逵  
萊爲幬析木爲楹明霞爲櫺或招羨門或授鴻寶我  
聞古有彭羣居而不老云胡棄人間始得長壽考吾  
寧倚大椿吾寧拾瑤草四歌曰有美西方人端居南  
海濱青蓮忽自華白鳥相與馴樞衣問其年千百億  
由旬齋居長者子咫尺爲比隣從之受真諦白馬徒  
下陳楊枝露在手大地皆陽春衆稱慈悲父庶矣肩  
能仁五歌曰海大魚名曰鯢日月可吐雲夢可吞任  
公避席詹何奔羣龍辟息六齋蹲天池有子化爲鵬

垂天之翼何峻嶒天風歎磅礴滄溟水六翮翩翩從此  
起直上扶搖九萬里計程一一爲君齒

右五更之歌

太玄吳氏宗譜序

浙以東則婺以文獻首諸郡烏傷爲婺上邑而太玄  
吳氏首邑中往不佞嘗式里門下宗廟進俎豆之士  
相與論先世而討舊章蓋泰伯執膺之宗延陵之胄  
也不佞故與吳公同籍比公按楚首舉不佞襄陽其  
後十五年不佞從公佐邦政公出所著太玄宗譜以  
示不佞幸而教之百朋嚮從君侯于荆歲在戊午先

公家食幸得以餘力譜吾宗比及季年業未就無祿先公卽世手澤塵存百朋旣終喪遂述先公之舊因先世之遺而爲之譜君侯故有土之大夫也序在君侯嗟乎公不棄不佞而以首事命之敢不敬諾旣公以省太夫人得請遣使程督京師使者曰歲旣單序可已不佞諾諾如嚮者卒未遑及公以御史大夫起南臺不佞亦且以寧親賜告公數以諾責來討豈其曠日久而惟一序之難不佞避席曰嗟乎序非難而序譜者難也非序譜之難序太玄之難也何也勺水則芥可舟埴井則鼃可泳行潦可揭中流可壺乃若東首

而望洋卽河伯曾不足以窺海若其所睹者大也太  
玄大矣聞道百者猶將困大方之家一難也由灌陽  
而下譜者十有六由燕國而下序者三十有三顯者  
若廬陵若京兆若豫章及我明興若潛溪文成文  
忠之屬率皆主盟當世豈不焯焯乎哉後死者得與  
於斯猶之登滕薛而班晉楚也二難也司馬遷終談  
之業其自序爲詳由太玄而望龍門公且優爲之矣  
今則以命不佞其將匿離朱而索象罔邪三難也三  
難難矣終不可以五稔而食成言竊惟仲尼尊周顧  
亟稱泰伯虞仲周德至矣卒集大命而身顯名夫惟

民無得而稱焉德斯其至也荆蠻自廢乃可與權宜  
其兄泰伯而弟之矣施及延陵季子其斯伯仲之遺  
風與太史公世家首吳卽周召瞞乎其後季子不立  
傳而附泰伯者特詳其讓有足多者春秋之首魯隱  
列傳之首伯夷皆是族也彼由魯衛以及凡祭非文  
之昭武之穆周公之胤乎卜世卜年亦旣滋大黍離  
以降其能食舊者幾何伯仲在吳僅以身匿及其胙  
之土而建之國僅足以當庶方小侯有吳肇祀以迄  
于今開國而王者十三追王者六爵五等者四十五  
都將相公孤者二十五譜具矣更僕悉數曾何負于

諸姬非此其身則其子孫此伯仲所不能逃而季子  
母讓也且也周賓杞宋世相後豈遠哉仲尼業已病  
其無徵雖盛弗傳非虛矣乃若有吳之故實視二代  
之後煌煌焉始訕而終羸始晦而終顯是天道也公  
之有事茲譜也豈其侘傺大而益紛華無亦彰既往  
厲方來使之率乃祖攸行世世興讓焉爾夫泰伯以  
天下讓季子以其國讓不亦謦乎大哉乃今簞食豆  
羹或見於色斗粟尺布或不相容一何細也彼以其  
大而讓此以其細而爭溷矣彼其風于百世聞者莫  
不立廉乃今承宗祏奉棗盛所不求世德而隕舊聞

非夫也雖然聚食太玄不啻千指卽有方之士衆矣  
豈皆無所待而興者乎記有之曰禮者衆之紀也紀  
散而衆亂則爭禮達而分定則讓故讓本於禮禮重  
於名譜也者所以正名辨分講讓去爭禮之善物也  
昔仲尼之正名也必先行其言言無所苟而脩身以  
踐之禮之質也往執政爲公志先公墓也則曰推產  
分讓其弟而卹孤賙急獨惓惓焉 先帝以任子加  
恩公舍其子而先兄之子此其見諸行事者較著匪  
徒託諸空言觀是譜者可以興矣嗟乎蓬生麻中不  
扶自直其受之地者然也弓冶之子必爲箕裘其受

之世者然也語其地則爲婺爲烏傷爲太玄禮俗刑  
矣語其世則爲泰伯爲仲雍爲季子世美濟矣作者  
皇皇於茲譜並以躬行先之讓道達矣藉第令一夫  
不直而猶有蓬之心是將以些窳而廢箕裘子之無  
良者也則斯譜也若澤劒首而述陳人序之者若劒  
首一呷耳嗟乎此作譜者之所深懼也此序譜者之  
所以爲難也

湖茫李氏三宗譜序

古者男子生而命之名藏之閭府州府歲至則籍而  
獻之君所婚則以日月告君大司徒職之夫家具在



卽五宗九族臚列可稽及夫世迭而籍亡籍亡而譜作繫之姓則有合類之族則有辨統之宗則有章其斯爲一家言凡以補國書之不逮近制盡編戶而書民數率十歲以爲期以覈名實不倖脫則僞增以攷異同不決裂則傳會以故糝者什五糝者什三論其世者昧焉而倚辦於譜爲尤急譜者或非世業徒取相沿儉則小而無徵奢則大而無當要之儉爲近禮雖孔子不繩宋以張殷近譜宜莫如北地李氏良儉故也豫章阻江湖而遠兵革應牛斗而藪人文列邑以什數其最者爲豐城著姓以百數其最者爲湖茫

李氏往者亡論已自不佞束髮過籍幸得侍諸君子  
同朝其間對公車起家文學侍從入則臺省出則藩  
臬大夫尊者且躋九列都六卿纍纍乎接衽於朝接  
軫於市矣此其視北地殆相什百譜者惡在其不奢  
善乎直指使者之譜三宗壹稟於典禮去奢去泰務  
考信以折其衷曹王臯出鎮洪都唐宗藩也得之宋  
志而信則以鼻祖祖之豫章刺史自河南來徙唐宗  
裔也攷之丘墓而信則以遷祖祖之勝爲處士伯順  
曾大父由此而世可知則自處士墓志徵之並祖之  
爲始祖珪琮珝若屈昭景蓋鼎足三分之珪守湖茫

琮卜小塘羽卜大陂三宗所由析也昭穆至今存焉  
各祖之爲別祖由大陂而卜新塘由湖茫而卜太原  
又其支也考之世次而信則附入之由曹王而溯其  
初唐書較著由曹王下逮其世次不可得而詳則闕  
之刺史始遷臨川居喬上其世次不可得而詳則闕  
之歷湖茫八世而得處士由高祖以上五世不可得  
而詳則闕之法曰行吾所明毋行吾所疑諸者率川  
此也故自受氏以迄曹王準唐書以爲系附以刺史  
準舊傳以爲徵作世原第一由始祖以及三宗之別  
子爲合圖三宗爲分圖爲續圖合之若網在綱分之

若源徂委作世圖第二圖僅書名耳圖左則書字書  
行書婚書宦書生歿書葬作世譜第三賢者以功行  
亢宗宗之庇也卽內德有足術者女史猶將不遺作  
世傳第四內傳第五對揚天子之顯命則世作忠志  
王言第六無徵不信雖善何爲信而有徵惟先世之  
文獻在其七則志藝文蓬生麻中不扶而直敦睦合  
族厥有宗盟其八則申族約凡我同盟言歸于好故  
惟要家爲諄諄譜成不佞從令君受而卒業竊惟穆  
叔以世祿爲不朽有辯者業已徵其不然夫世祿本  
之乎世官大氏皆食舊耳乃今祿者不世直將以奉

有德詔有功揚有言三而一立焉則不朽之云也藉  
令世世勿絕視古官族何讓焉粵自隴西無聞三宗  
代起其出太原苗裔母復問其山陵卽近世以來對  
公車起家文學侍從若臺省藩臬九列六卿聚族數  
十餘曹何奕奕也昔有虞十六族二氏出焉乃今一  
本而三宗顯者林立概以砥名礪行尊主庇民外之  
宣力四方內之論思獻納卽未必能廢明良選元愷  
不亦良顯乎哉燕工函粵工鑄假令族工爲政焉往  
而不容惟適燕粵而無良則卻步夫人而中村焉往  
而不爲子惟產二氏而不類則敗羣故良弓良冶世

受箕裘兩服兩驂必先反駕非此族也其不爲隴西也者幾希其在詩曰無念爾祖又曰世德作求信能念之求之則國之太史太常咸在譜者猶嚆矢耳直指使者名栻居湖茫令君名琯出小塘其世次在譜中今君其父黨也

### 寧國府志序

高皇帝首徵發佐軍興寧國若在關中河內及建畿甸若在左馮翊而輔南都 詔復民田先後凡六下帝澤周渥不啻登三輔而上之非直以其民勞抑其地重矣郡故有成化癸巳志蓋什一厯存其後六十

年爲嘉靖癸巳建安李太宰出佐郡從而脩之視舊  
多所芟夷其文省矣第涉太簡而信古者將無稽其  
後四十年 天子建元癸酉南海陳使君出守是郡  
惟興廢爲莘莘齋宿抵梅太中以郡志請太中家世  
受史故以文獻首郡中俊懼曠日久而籍滋亡是在  
掌故太中敬諾則式閭而下貢東平昔太宰有事纂  
脩東平方以諸生受事乃今與太中共此者其惟東  
平由是東鄉而進諸孝廉揖沈仲子君典南鄉而進  
諸博士弟子揖梅叔子禹金相語曰兩生才且並以  
承家顯今茲之事僕誠不足以致兩生太中在焉兩

生毋讓矣於是丙子首事旬月而告成使君紹介太  
中幸然而教不佞先之以君典申之以禹金禹金之  
言曰兩生幸得交二仲驪重以君侯若家大夫命令  
茲之事具在職方以故越境而就正先生先生序矣  
夫郡之志亦猶乎國之史也古者列國有史世史職  
之於是乎業不分法不撓矣乃今守相之視郡猶遠  
廬也始入境風土謠俗不及知卽知之不及察久之  
察矣凡諸廢置因革不及行將載筆而籍之日不暇  
給藉令儉咨諏而疏考核其足術也者幾希何所病  
之病無徵也乃今縉紳學士視鄉先生都鄙所藏視



閻史閻府其言不越乎丘里寧詎非家至而日見之  
顧琬琰相持瑕瑜相掩瑜而琬則冒然無當瑕而琰  
則灑然目攝之彼將幸得免於鄉人玉石糅矣卒之  
聲不中窾其足術也者幾希何所病之病不尊也晉  
楚大矣春秋以魯特聞仲尼志在春秋其文則史卽  
匹夫用天子事將安罪之古今作者無慮百家而太  
史公最著蓋世守其業斐然成一家言班氏代興則  
其次也昔太中視學東魯憑軾而入鄉射鄒嶧之墟  
概諸春秋如親奉教叔子嫻於文學夫非龍門之徒  
與且也東平篤於躬行君典褒然首舉得人具矣於

時方議久任使君居五載而政成雖決筴壹稟於使君終不以長人而自用幸而太中爲政二三君子左右之上有尊而下有徵不求信於民而民信之矣往不佞守襄陽將有志而未逮頃年有司志吾郡不佞越在行間今而後益知遇合之難矣志爲卷二十圖亦如之爲郡紀一爲表三爲志九爲列傳十有五雜紀一附焉視太宰志凡四倍之備矣而太中猶嗛嗛也務自求多成化志繁嘉靖志略是役也事增而文未省則余之咎也夫夫天有詘信地有翕闢亦各以其時行耳宛故饒形勝玄暉太白遞賓之自宋以迄

於今林林乎皆宛產矣我國家列在首善承平餘  
二百年天運地靈于斯爲盛顧今章相之士骨鯁之  
臣贊持衡侍交戟者祗相接也異日者挾風雲起巖  
穴紛紛嚮用何可勝原時詘而信時翕而闢天地且  
不能違之矣其斯爲羣生之府乎時至而百志成志  
之所由盛也典謨約矣春秋不以其故貶經春秋嚴  
矣遷固不以其故貶史要皆篤於時也太中何嗛嗛  
乎志曰鳬短鶴長不佞有味乎其言矣

黃巖縣志序

古昔畫地置侯秦始罷侯置令今之令古諸侯也諸

侯守在四境舉境內而疆理之載筆特書具有圖籍  
春秋在魯晉楚先焉志之屬也 高皇帝大一統分  
部而概志之區別臚陳則有司在迄今或志或不豈  
分土殊哉大都令至屢遷每病不暇暇矣病不徵非  
志之難得其人爲難非得人之難得其時爲尤難矣  
今天子絜令萬國持久任以受成功庶尹優優皆得  
緣文學以飾吏治故者更始亡者開先則其時也袁  
令君治黃巖者五稔治具畢張公暇則帥縣文學諸  
生爲黃巖縣志草旣具歲當實成今君自言卽黃巖  
何敢望三都顧司馬不負玄晏司馬序矣昔黃帝神

遊而求至道台州乃當華胥氏之陽至武德而郡始  
名則遊方之外者也黃巖爲郡巖邑至天授而邑始  
名民靜而安俗樸而儉閭閻禮讓不恩官司概諸華  
胥氏之隣則方內矣及文公以行部至彼郡人士北  
面得師遵海而南蔚爲鄒魯當宋不祚相與蹈東海  
以從首陽我 明天造未寧諸耆舊率以赤心而連  
九族章縫俎豆斐然鄉風旣襲承平善俗弟靡比歲  
壬子不保都鄙鄉遂爲墟丁夫釋耒而卽戎中人破  
產而趨末麻一蓬百寧詎能不扶而直哉善乎令君  
之言今之彫敝則反朴之資也顧民不虛偃風在長

民前事之不忘後事者之師也語曰視已成事其謂  
志與志爲卷者七爲綱者五爲目者五十有三有分  
土而後有分民故首輿地乃若設地險以固吾圉興  
水利以粒吾民懲往開來當事者之所汲汲者也政  
由俗革故惟風俗爲詳食貨者土之實民之天也故  
次之王者設官以爲民官師備而政教興矣故次職  
官人傑地靈則地以人取重故次人物由古蹟而之  
祥異亦旁綜者所不遺故以外志附之則天時因地  
利刑民俗作人文一操牘而四者得矣其斯以爲長  
民者觀也今人與居古人與稽粵鑄燕函毋失其舊

其斯以爲都人士觀也信斯志也不亦有徵乎哉今  
君得聞不佞之言咕咕自喜應祺不令冒然懸書邑  
中代斲之謂何何所藉手幸得一當司馬卽侯萬戶  
何加焉行且質之職方其藉司馬爲紹介於是置之  
首簡挾策遂行

### 弇州山人四部藁序

儒者雅言三代代興如錯行秦其歸餘也漢與寓內  
更始時爲履端文帝虛已下人賈生崛起進之陳說  
國體退之祖述楚辭有開必先此其嚆矢武帝孳孳  
文學多士應感而興兩司馬爲之擅場左右並建漢

臣自侈當世炳焉與三代同風概諸文獻有徵則其人以也由漢而下歸餘于元我太祖再造中國咸與維新孝宗虛已下人與孝文之治同道士興勃勃而李獻吉以脩古特聞策事摘辭成籍具在方諸賈生近之矣世宗以禮樂治天下壽考作人何可勝原於時濟南則李于鱗江左則王元美畫地而衡南北遞爲桓文浸假與兩司馬相周旋駢駢足當駟牡夫得天者乘其運逢世者挾其資此六君子者非有所待而後興非有所約而後合天德王則從而王世道隆則從而隆于載一時今爲烈矣顧兩司馬以



作者命世至今誦法不衰後死者幸得與于斯文殆亦瞠乎其後一旦互執鞭弭寧詎能方駕而駟之竊惟尺寸異長詩書異教藉令變典禮而龍典樂將不耐不窮何以故所用非所長也長卿之長長于敷陳詩教也子長之長長於紀述書教也就其偏長莫不畢至脫或求其具足能無窮乎善乎元美之多于鱗也其言曰漢廷兩司馬吾代一攀龍言兼長也斯言也上士然之疑之中士駭之下士聞而笑之及于鱗之籍既傳則然者疑亡駭者意下笑者掩口退矣于鱗役僕百家睚眦千古始得元美驩甚吾柰何從海

內一當王生舉世方以無譽憚于鱗卽元美無所用  
譽不佞三從元美問籍元美猶然逡巡及其蒞四嶽  
而籍始傳蓋倍于鱗者六之五其分部者四其卷百  
八十其筴六十有奇自昔成一家言未有若此之富  
者也北地亡而大道隱于鱗桴而元美鼓之聞者具  
曰李王千里響應乃今二籍並著其誰能左右之邪  
于鱗與古爲徒祖三墳而禰六籍其書非先秦兩漢  
不讀其言非古昔先王不稱其論著非挾日不成其  
逐射而當古人非上駟不以駕故片言出而人人自  
廢不則無言元美上窺結繩下窮掌故於書無所不

讀于體無所不諳其取材也若良冶之操鑪輔卽五金三齊無不可型其運用也若孫武韓信之軍卽宮嬪市人無不可陳無不可戰左之左之無不宐之右之右之無不有之則惟元美能耳大較于鱗之業專專則精而獨至元美之才敏敏則洽而旁通濟南奇絕天際峨嵋語孤高也大海迴瀾則元美自道不亦洋洋乎大哉要以峨嵋之高蟠于四極惡在其不禦而三山雄峙瀛海肩五嶽如老更卽天假于鱗以年終不暇乘桴而浮海至若元美所陟寧無蹴高天俯積雪者乎首賦若在上林鴈行當代無兩比于載筆

學舊史氏如孫叔敖其稱詩著書力敵于鱗而富倍之矣賈其餘富爲說家言則諸君子之所不遑楚左史之所未觀者也且也病渴論腐兩司馬以跼蹐終元美旅力方剛幸而得謝率履坦坦綽有前途由今而望崦嵫不啻十舍茲所就業豈其稅駕所哉于鱗亟稱易辭日新之謂盛德日新則高明矣于鱗有焉要以富有而日新非元美不任也斯言也聞者不能無然歎無駭笑顧元美之籍傳矣以不聞聞者庶乎先得我心如或咻公孫爲齊人吾其引避之莊嶽以俟論定

陳達甫集序

秦茅氏曰三天子都混沌未鑿歷千歲塊然耳迨宋  
篤生徽國此其豐鎬與明興百年程學士高時金  
馬卽其才命世而從衆如流及程自邑稱北地詩直  
將以賁土爲桴鼓嗣是王仲房江民瑩起歛陳達甫  
起海陽堅白並鳴鏜鏜自負其人則達甫諒直樸然  
柴立其中彊而廢春秋耆而廢詞賦藁旣具觀者輒  
持去不復求以余耳目所及者索之佚者半余爲之  
太息安得封禪書邪概其平生則高言不必驚人微  
言不必媚世文自左馬以窮墳典詩自李杜以遡康

衡體相沿或不沿辭相襲或不襲顧混然同氣漠然  
同心鏗然同聲蒼然同色此可與道古者賞難與儕  
俗者程也仲先達甫亡矣伯始杖國中集文若詩厯  
百篇吾將藏之白嶽之石室嗟乎山川竅矣吾其倏  
忽也哉

### 副墨自序

汪道昆曰余先世家大鄣徙千秋里里中世受什一  
余始以逢掖起家幼受業先師喁喁慕古旣卒業退  
以其私發篋徧讀藏書卽屬辭壹稟於古昔師弗善  
也則以告家大夫孺子嚶嚶而務多聞將害正業家

大夫敬諾篋中非博士業悉遷之旣對公車余始舍  
業而脩古比出居縣日治程書不遑入爲尚書郎屬  
司馬有巡功視師之役諸郎斌斌講業余不能從旣  
而治郡治兵歷十年所其間什九廢業謂官先事非  
與屏居篋中計餘年可足吾事會病視去而爲方外  
遊將吹律以應咸池僅一呿耳客至請余故業願得  
比諸作者懸書國門嗟乎當世以作者鳴八音備矣  
劍首曾不足以當里耳卽一呿何爲以此而希有聞  
恥也及余奉 詔彊起自鄖關之夏門客曰閩署鄖  
署遞災公兩亡載籍獨公之舊草具在夫非祝融氏

所畱邪古人成一家言必以名山爲藏室泰衡當文明之域其斯爲祝融氏之虛第載故業藏之亦不朽之事也不佞結髮從政斑白猶在行間將竊餘力以從古人日不暇給卵而未翼惡取一鳴託轂音於九臯吾知其無和也已藉令得脩故業終餘年卽未能張樂洞庭郢中宜有和者客姑待之客笑曰所貴於郢中則流商刻羽是已蕢桴土鼓上世有遺音焉此亦轂音之微一映之屬也公之髮日短矣雖好古之心未化惡能從長待河之清歲不我與豈必鈞天廣樂而後盈耳哉人亦有言惟山藏疾不佞故多疾且



謾藏客將棄其疾而善藏之敢不惟命於是副墨之  
子則以公起家四岳玄時在望嵩華參衡乃今有事  
衡山請書其副以胥後命從之

太函集卷之二十二